

Na osnovu člana 12 i 14. Zakona o udruženjima i fondacijama Federacije Bosne i Hercegovine („Službene novine Federacije BiH“, broj 45/02), Osnivačka skupština Udruženja građana „Društvo fizičara u Federaciji Bosne i Hercegovine“ na sjednici održanoj 01.04.2017. godine u Sarajevu donosi:

STATUT UDRUŽENJA GRAĐANA

„Društvo fizičara u Federaciji Bosne i Hercegovine“

I OPĆE ODREDBE

Član 1.

Udruženje građana „Društvo fizičara u Federaciji Bosne i Hercegovine“ (u daljem tekstu Udruženje) je nevladino, neprofitno, dobrovoljno, vanstranačko udruženje građana zainteresovanih za unapređenje svih aspekata fizike i položaja fizike kao fundamentalne i primijenjene nauke na području Federacije Bosne i Hercegovine, osnovano je u skladu sa Zakonom o udruženjima i fondacijama Federacije Bosne i Hercegovine („Službene novine Federacije BiH“, broj 45/02) (u daljem tekstu Zakon).

Član 2.

Ovim Statutom, se uređuje:

- naziv Udruženja, skraćeni naziv i sjedište Udruženja,
- oblik i sadržaj znaka i pečata Udruženja,
- ciljevi i djelatnost Udruženja,
- uvjeti i način učlanjenja u Udruženje, prava, dužnosti i odgovornosti članova Udruženja, kao i prestanak članstva,
- organi Udruženja, njihove ovlasti, način imenovanja i opoziva, trajanje mandata, kvorum i pravila glasanja
- zastupanje i predstavljanje Udruženja,
- javnost rada Udruženja,
- način sticanja, korištenja i raspolaganja novčanim sredstvima Udruženja i nadzor nad korištenjem tih sredstava,
- sticanje i raspolaganje imovinom,
- način donošenja finansijskog izvještaja i izvještaja o radu,

- postupak za izmjenu i dopunu Statuta, ovlaštenja i način donošenja drugih općih akata,
- uvjeti i postupak za pripajanje, razdvajanje, transformaciju ili prestanak rada Udruženja,
- postupak za raspolaganje imovinom i drugim sredstvima u slučaju raspuštanja ili prestanak rada Udruženja,
- druga pitanja od značaja za organizaciju i djelovanje Udruženja,
- prelazne i završne odredbe.

II – NAZIV I SJEDIŠTE UDRUŽENJA

Član 3.

Puni naziv Udruženja na bosanskom jeziku je *Društvo fizičara u Federaciji Bosne i Hercegovine*.

Skraćeni naziv Udruženja na bosanskom jeziku je DFuFBiH.

Naziv Udruženja na engleskom jeziku je *Physical Society in Federation of Bosnia and Herzegovina*.

Skraćeni naziv Udruženja na engleskom jeziku je PhSFB&H

Sjedište Udruženja: Ulica Zmaja od Bosne 35, 71 000 Sarajevo, Bosna i Hercegovina (zgrada Prirodno-matematičkog fakulteta Univerziteta u Sarajevu)

III – ZNAK I PEČAT UDRUŽENJA

Član 4.

Udruženje ima svoj znak. Znak Udruženja je okruglog oblika. Naziv Udruženja ispisan latiničnim pismom na bosanskom jeziku kružno po rubu znaka. U sredini znaka je ispisano slovo „F“ oko kojeg su opisane dvije elipse koje simboliziraju kruženje elektrona u atomu.

Udruženje ima veliki pečat okruglog oblika prečnika 50 mm i mali pečat okruglog oblika prečnika 30 mm. Na ivici pečata je ispisan puni naziv Udruženja latiničnim pismom na bosanskom jeziku. U sredini znaka je ispisano slovo „F“ oko kojeg su opisane dvije elipse koje simboliziraju kruženje elektrona u atomu.

Mali pečat je namijenjen isključivo za ovjeru virmana i druge finansijske te blagajničke dokumentacije.

IV – CILJEVI I DJELATNOST UDRUŽENJA

Član 5.

Ciljevi Udruženja

Ciljevi Udruženja:

- širenje i unapređenje naučnih, stručnih i primijenjenih znanja iz oblasti fizike i njenih primjena u Federaciji Bosne i Hercegovine,
- unapređenje i popularizacija nastave iz predmeta Fizika u osnovnim i srednjim školama u Federaciji Bosne i Hercegovine,
- otkrivanje, podsticanje i pomaganje razvoja talenata za fiziku iz reda učenika osnovnih i srednjih škola, kao i studenata na visokoškolskim ustanovama,
- unapređenje nivoa stručnih i naučnih znanja i vještina članova Udruženja, kao i
- unapređenje statusa nastavnika i profesora fizike u Federaciji Bosne i Hercegovine.

Član 6.

Djelatnost kojima se ostvaruju ciljevi Udruženja:

- organizacija naučnih i stručnih konferencija, kongresa, simpozija, seminara, radionica, i drugih oblika okupljanja, razmjene informacija i obrazovanja istraživača i praktičara iz područja fizike i srodnih nauka,
- saradnja sa sličnim udruženjima i organizacijama u Bosni i Hercegovini i inostranstvu radi razmjene znanja i informacija, te organizacija zajedničkih skupova, radionica, seminara, takmičenja i slično,
- saradnja sa visokoškolskim ustanovama u Federaciji Bosne i Hercegovine i ministarstvima obrazovanja na svim nivoima vlasti radi ostvarivanja ciljeva Udruženja,
- izdavanje priručnika i drugih publikacija iz domena fizike i njenih primjena,
- organizacija takmičenja iz fizike i srodnih oblasti,
- pripremanje učenika i studenata za takmičenja iz fizike i srodnih nauka na svim nivoima, pripremanje i organizacija odlaska učenika i studenata na takmičenja na nivou Federacije Bosne i Hercegovine i na nivou Bosne i Hercegovine, kao i na međunarodna takmičenja iz fizike i srodnih nauka,

V – ČLANSTVO

Član 7.

Član Udruženja, u skladu sa Zakonom, može biti državljanin Bosne i Hercegovine i strana osoba koja ima stalni ili privremeni boravak u Bosni i Hercegovini.

Članstvo u Udruženju je dobrovoljno.

Članom Udruženja postaju osobe koje prihvate Statut i ciljeve Udruženja, te potpišu pristupnicu na propisanom obrascu.

Članovi Udruženja mogu biti redovni i počasni.

Redovni članovi mogu biti nastavnici fizike u osnovnim školama, profesori fizike u srednjim školama, nastavnici i saradnici iz oblasti fizike na višim školama i fakultetima (visokoškolskim ustanovama), lica koja su završila I i/ili II stepen studija fizike svih usmjerenja, magistri i doktori nauka iz fizike, studenti studija fizike, kao i svi ostali građani Bosne i Hercegovine koji prihvataju Statut i brinu za ostvarivanje ciljeva Udruženja.

Odluku o prijemu u redovno članstvo donosi Upravni odbor udruženja.

Svi članovi učestvuju u radu Skupštine Udruženja.

Počasni članovi Udruženja mogu postati, uz prethodnu njihovu saglasnost, sva lica koja značajno doprinose širenju i unapređenju fizike i njene primjene u Federaciji Bosne i Hercegovine.

Odluku o imenovanju počasnih članova Udruženja donosi Skupština Udruženja na prijedlog Upravnog odbora ili pojedinačnih članova Udruženja.

Počasni članovi Udruženja imaju pravo sudjelovati u radu Skupštine Udruženja.

Udruženje izdaje člansku kartu čiji izgled i sadržinu određuje Upravni odbor Udruženja.

Udruženje vodi evidenciju svojih članova u skladu sa Zakonom, ovim Statutom i drugim aktima Udruženja.

U znak priznanja za savjesno ispunjavanje zadataka za posebne rezultate i za savjestan i predan rad, Udruženje može pohvaliti i nagraditi svoje članove. Pohvale i nagrade izdaju se u vidu pohvalnica i diploma. Odluku o pohvalama i nagradama donosi Skupština Udruženja.

Član 8.

Članovi Udruženja plaćaju članarinu Udruženju.

Odluku o visini i načinu plaćanja članarine donosi Skupština Udruženja.

Počasni članovi Udruženja su oslobođeni plaćanja članarine.

Član 9.

Međusobni odnosi članova Udruženja su zasnovani na ravnopravnosti, zajedničkoj aktivnosti i odgovornosti u ostvarivanju zadataka i izvršenju poslova koji proističu iz ciljeva Udruženja.

Član Udruženja ima pravo da:

- bira i bude biran u organe i tijela Udruženja,
- redovno i blagovremeno bude obavješten o aktivnostima Udruženja,
- učestvuje u aktivnostima kojima se obezbjeđuje izvršenje ciljeva Udruženja,
- koristi servise Udruženja i
- ostvaruje druga prava utvrđena ovim Statutom i drugim aktima Udruženja.

Član 10.

Član Udruženja je dužan da:

- aktivno učestvuju u ostvarivanju ciljeva Udruženja,
- djeluje na afirmisanju djelatnosti Udruženja,
- poznaje strukturu i način djelovanja Udruženja,
- poznaje realizovane i tekuće projekte Udruženja,
- realizuje zadatke koje mu povjere organi i tijela Udruženja,
- poštuje interna pravila rada Udruženja,
- svoja znanja i zvanja stavi u službu Udruženja,
- doprinosi sprečavanju pojava bilo kakvih negativnih aktivnosti u radu organa, tijela ili pojedinih članova Udruženja i blagovremeno ukaže na njih,
- svojim ponašanjem čuva ugled Udruženja,
- saraduje sa drugim članovima Udruženja,
- čuva materijalna i intelektualna dobra Udruženja,
- ostvaruje kontrolu rada izabраниh predstavnika, članova organa i tijela Udruženja,
- redovno plaća članarinu,
- obavlja druge poslove koje mu povjere organi i tijela Udruženja, u skladu sa ovim Statutom i drugim aktima Udruženja.

Član 11.

Članstvo u Udruženju prestaje:

- istupanjem iz članstva,
- brisanjem iz članstva,
- isključenjem iz članstva.

Po prestanku članstva, Udruženju se vraća članska karta.

Svaki član može istupiti iz Udruženja, na osnovu pismene izjave o istupanju, koju dostavlja Upravnom odboru Udruženja.

Kao dan prestanka članstva smatrat će se datum prijema izjave o istupanju.

Brisanje iz evidencije članstva provodi se nastupom jedne od sljedećih okolnosti:

- ako je prilikom učlanjenja u Udruženje potpisnik pristupnice dao netačne ili neistinite podatke,
- ako član Udruženja nije platio članarinu dvije godine uzastopno, a to ne učini ni 3 (tri) mjeseca nakon što ga je nadležni organ Udruženja upozorio na obavezu plaćanja duga po osnovu članarine.

Brisanjem iz članstva prestaju sva, prema Statutu, važeća prava i odgovornosti člana Udruženja.

Protiv brisanja iz evidencije članstva žalba nije dopuštena. Član koji je brisan iz evidencije zbog neplaćanja članarine, može ponovo pristupiti Udruženje na način kao da prvi put pristupa Udruženju a nakon što otkloni razlog zbog kojeg je brisan iz evidencije.

Član Udruženja koji grubo krši Statut Udruženja, ne izvršava svoje obaveze prema Udruženju, svojim postupcima nanosi štetu ili narušava ugled Udruženja, upotrebljava materijalna i/ili intelektualna dobra Udruženja bez odobrenja nadležnog organa Udruženja, može biti isključen iz Udruženja.

Inicijativu za isključenje može pokrenuti član ili organ Udruženja, podnošenjem pismenog obrazloženog prijedloga Upravnom odboru Udruženja.

Prije donošenja odluke o isključenju, član Udruženja koji se isključuje mora biti pismeno obaviješten o prijedlogu za isključenje, kao i razlozima zbog kojih se predlaže isključenje.

Članu Udruženja se mora ostaviti razuman rok od najmanje 30 (trideset) dana za izjašnjenje o pokrenutom prijedlogu za isključenje iz Udruženja.

Odluku o isključenju člana donosi Upravni odbor Udruženja.

Protiv odluke Upravnog odbora Udruženja, u roku od 30 (trideset) dana, može se izjaviti prigovor Skupštini Udruženja, čija je odluka konačna.

VI – ORGANI UDRUŽENJA

Član 12.

Organi Udruženja su:

- Skupština,
- Upravni odbor, i
- Nadzorni odbor.

Skupština Udruženja

Član 13.

Skupština Udruženja (u daljem tekstu Skupština) je najviši organ Udruženja i čine je svi članovi Udruženja.

Skupština može biti izborna, redovna i vanredna.

Izborna skupština se održava svake četiri godine.

Redovna skupština održava se jednom godišnje i ima za cilj kontrolu rada putem razmatranja godišnjeg izvještaja o radu, finansijskog izvještaja Udruženja i donošenja godišnjeg plana rada i finansijskog plana Udruženja za narednu kalendarsku godinu.

Iz praktičnih razloga, redovna i izborna Skupština mogu se spojiti.

Vanredna skupština se održava po potrebi i na njoj se razmatraju aktuelna pitanja od značaja za rad Udruženja iz nadležnosti Skupštine i donose odluke po tim pitanjima.

Redovna i vanredna skupština, ukoliko nije i izborna, mogu se održati i elektronskim putem.

Član 14.

Poslove iz svoje nadležnosti Skupština obavlja na sjednicama.

Sjednice Skupštine su javne.

Na sjednicama Skupštine mogu biti prisutni i sudjelovati u radu i predstavnici zainteresovanih organa i organizacija, ali bez prava odlučivanja. Predstavnik organa ili

organizacije koji je pozvan na sjednicu Skupštine može sudjelovati u raspravi samo o onim pitanjima radi kojih je pozvan na sjednicu Skupštine.

Izbornu i redovnu skupštinu saziva Predsjednik Skupštine i o tome, pismeno ili elektronskim putem, obavještava članstvo najmanje 15 (petnaest) dana prije datuma održavanja Skupštine.

Dnevni red Skupštine i mjesto njenog održavanja, kao i prateći materijali (izvještaji i pisani prijedlozi o kojima će se na Skupštini raspravljati i odlučivati), dostavljaju se svim članovima Udruženja u elektronskom obliku najmanje sedam 7 (sedam) dana prije održavanja sjednice Skupštine.

Ako Predsjednik Skupštine ne sazove Skupštinu na vrijeme, Nadzorni odbor je dužan ispitati razloge za to i može pokrenuti postupak radi sazivanja te Skupštine.

Vanrednu skupštinu saziva Predsjednik Skupštine po potrebi na pismeno obrazloženi zahtjev Nadzornog odbora ili jedne trećine članova Udruženja.

Ako Predsjednik Skupštine ne sazove vanrednu Skupštinu u roku od 30 (trideset) dana od dana kada je upućen takav zahtjev, Skupštinu mogu sazvati predlagači.

Vanredna skupština odlučuje samo o pitanjima iz predloženog dnevnog reda.

Ako je na dnevnom redu izmjena ili dopuna Statuta, sazivač Skupštine je obavezan da sa predloženim promjenama upozna sve članove Udruženja, te da im na uvid stavi tekst predloženih promjena ili dopuna najmanje 30 (trideset) dana prije dana održavanja Skupštine.

U slučaju privremene spriješenosti Predsjednika Skupštine da sazove ili predsjedava sjednicom Skupštine, to će umjesto njega učiniti:

- sjednicu saziva Predsjednik Udruženja,
- sjednicom predsjedava jedan od članova Udruženja, koji se izabere većinom glasova prisutnih članova na početku sjednice.

Skupština punovažno odlučuje ako sjednici Skupštine prisustvuje najmanje polovina članova Udruženja.

Broj prisutnih članova utvrđuje se na početku sjednice Skupštine.

Skupština donosi odluke javnim glasanjem.

Skupština donosi odluke većinom glasova prisutnih članova Skupštine.

Odluku o pripajanju, razdvajanju ili prestanku rada Udruženja Skupština donosi dvotrećinskom većinom prisutnih članova Skupštine.

O radu Skupštine se vodi zapisnik, i to na način da odražava bitan tok rada i suštinu svih odluka i zaključaka.

Član 15.

Skupština Udruženja u okviru svojih nadležnosti:

- donosi Statut Udruženja,
- usvaja izmjene i dopune Statuta, te daje tumačenje istog,
- donosi Poslovnik o radu Skupštine,
- donosi Program rada Udruženja,
- donosi odluke o imenovanju i opozivu:
 - članova Upravnog odbora,
 - članova Nadzornog odbora,
 - predsjednika i potpredsjednika Udruženja,
 - predsjednika Skupštine i
 - sekretara Udruženja,
- donosi odluku o imenovanju počasnih članova Udruženja,
- donosi odluke o pohvalama i nagradama zaslužnim članovima Udruženja,
- donosi konačnu odluku o eventualnom isključenju članova Udruženja,
- donosi odluku o formiranju radnih i pomoćnih tijela Skupštine (odbora, komisija, sekcija i slično), te ocjenjuje njihov rad,
- razmatra i usvaja izvještaje o radu Udruženja, kao i organa Udruženja i radnih tijela koje imenuje Skupština Udruženja,
- usvaja godišnji finansijski izvještaj Udruženja i finansijski plan za narednu kalendarsku godinu,
- utvrđuje plan povećanja, odnosno smanjenja imovine Udruženja,
- odlučuje o visini i načinu plaćanja članarine,
- odlučuje po žalbama članova u drugom stepenu,

- odlučuje o pripajanju, razdvajanju, raspuštanju i prestanku rada Udruženja, kao i drugim statusnim promjenama Udruženja i
- odlučuje o drugim pitanjima u skladu sa Zakonom i ovim Statutom.

Poslovníkom o radu Skupštine bliže će se urediti pitanja od značaja za rad i odlučivanje na Skupštini Udruženja.

Član 16.

Skupština Udruženja bira predsjednika Skupštine.

Predsjednik Skupštine bira se iz redova članova Skupštine.

Predsjednik Skupštine saziva, predsjedava i rukovodi radom Skupštine.

Mandat Predsjednika Skupštine traje četiri godine uz mogućnost ponovnog izbora.

Predsjednik Skupštine ne može biti član Upravnog odbora i Nadzornog odbora Udruženja.

Predsjednik Skupštine može zatražiti svoje razrješenje prije isteka mandata na koji je izabran, a dužan je obavljati svoje dužnosti do donošenja odluke o svom razrješenju.

Predsjednik Skupštine može biti opozvan i prije isteka mandata na koji je biran ukoliko ne ispunjava svoje obaveze ili krši odredbe ovog Statuta.

Prijedlog o razrješenju Predsjednika Skupštine iz prethodnog stava može uputiti Upravni odbor ili najmanje jedna trećina članova Udruženja. Prijedlog se upućuje Skupštini pismenim putem uz obrazloženje.

Skupština donosi odluku o razrješenju predsjednika Skupštine, i ta odluka je konačna.

Član 17.

Predsjednik Skupštine u okviru svojih nadležnosti:

- stara se o organizovanju rada Skupštine i saziva njene sjednice,
- predlaže dnevni red Skupštine, u saradnji sa Upravnim odborom i predsjednikom Udruženja,
- predsjedava sjednicama Skupštine,
- potpisuje akte donesene na Skupštini,

- stara se o izvršavanju odluka, zaključaka i drugih akata Skupštine, i
- vrši i druge poslove u skladu sa Zakonom, ovim Statutom i drugim aktima Udruženja.

Upravni odbor Udruženja

Član 18.

Upravni odbor je izvršni organ Udruženja, koji se stara o sprovođenju ciljeva Udruženja utvrđenih ovim Statutom i odlukama Skupštine.

Upravni odbor broji 17 (sedamnaest) članova, uključujući predsjednika i potpredsjednika Upravnog odbora i sekretara Udruženja.

Članove Upravnog odbora bira Skupština, uzimajući pri tom u obzir pokrivenost svih nivoa obrazovanja i oblasti djelovanja Udruženja, regionalnu zastupljenost, obim njihovih obaveza, kao i druge okolnosti važne za donošenje odluke o izboru.

Mandat članova Upravnog odbora traje četiri godine, uz mogućnost ponovnog izbora.

Članovi Upravnog odbora ne mogu biti birani za predsjednika Skupštine niti za članove Nadzornog odbora Udruženja.

Predsjednik Udruženja je ujedno i predsjednik Upravnog odbora.

Potpredsjednik Udruženja je ujedno i potpredsjednik Upravnog odbora.

Upravni odbor za svoj rad odgovara Skupštini Udruženja.

Svaki član Upravnog odbora može zatražiti svoje razrješenje prije isteka mandata na koji je izabran, a dužan je obavljati svoje dužnosti do donošenja odluke o razrješenju.

Član Upravnog odbora može biti razriješen i prije isteka mandata ukoliko ne ispunjava svoje obaveze ili krši odredbe ovog Statuta.

Odluku o razrješenju člana Upravnog odbora iz prethodnog stava donosi Skupština na prijedlog Upravnog odbora.

Upravni odbor u cjelini može biti opozvan i prije isteka mandata na koji je biran ukoliko ne ispunjava svoje obaveze ili krši odredbe ovog Statuta.

Opoziv Upravnog odbora iz prethodnog stava može predložiti Skupština ili najmanje jedna trećina članova Udruženja čiji se prijedlog razmatra na sljedećoj sjednici Skupštine.

Odluku o opozivu donosi Skupština.

Član 19.

Upravni odbor radi u sjednicama.

Sjednice se sazivaju po potrebi, a najmanje dva puta godišnje.

Upravni odbor punovažno odlučuje ako sjednici prisustvuje više od polovine članova Upravnog odbora.

Odluke se donose većinom glasova prisutnih članova Upravnog odbora.

Sjednicom Upravnog odbora rukovodi predsjednik Upravnog odbora.

U slučaju nemogućnosti da predsjednik Upravnog odbora vodi sjednicu, vođenje sjednice će preuzeti potpredsjednik Upravnog odbora.

Član 20.

Upravni odbor u okviru svojih nadležnosti:

- organizuje sprovođenje odluka, zaključaka i stavova Skupštine,
- donosi Poslovnik o svom radu,
- priprema dnevni red Skupštine, u dogovoru sa predsjednikom Skupštine,
- podnosi i predlaže Skupštini:
 - godišnji izvještaj o svom radu,
 - godišnji izvještaj o radu Udruženja,
 - godišnji finansijski izvještaj Udruženja,
 - godišnji plan rada Udruženja,
 - finansijski plan za narednu kalendarsku godinu,
 - nacrt izmjena i dopuna Statuta i drugih akata koje donosi Skupština,
 - visinu i način plaćanja članarine.
- upravlja imovinom Udruženja,
- usvaja prijedlog zaslužnih članova za dodjelu pohvala i nagrada,

- odobrava sklapanje ugovora o saradnji sa drugim domaćim i inostranim Udruženjima i organizacijama,
- imenuje i razrješava članove komisija i po potrebi bira i razrješava predstavnike drugih organa i tijela,
- razmatra i usvaja:
 - program rada komisija i sekcija Udruženja,
 - godišnji izvještaj o radu i poslovanju komisija i sekcija Udruženja,
- donosi odluku o:
 - prijemu, brisanju ili isključenju članova Udruženja,
 - troškovima službenih putovanja i službenih dnevnica i
 - izgledu i sadržaju članske karte.
- vrši i druge poslove u skladu sa Zakonom, ovim Statutom i drugim aktima Udruženja.

Poslovníkom o radu Upravnog odbora bliže će se urediti pitanja od značaja za rad i odlučivanje Upravnog odbora Udruženja.

Član 21.

Upravni odbor po potrebi može formirati i povremene komisije i druga radna tijela.

Djelokrug, način rada i sastav komisija i drugih radnih tijela reguliše se Poslovníkom o radu Upravnog odbora.

Sekretar Udruženja

Član 22.

Skupština imenuje Sekretara Udruženja na mandatni period od četiri godine sa mogućnošću ponovnog izbora.

Sekretar Udruženja je ujedno i član Upravnog odbora.

Sekretar Udruženja ne može biti biran za predsjednika niti potpredsjednika Upravnog odbora.

U slučaju duže spriječenosti Sekretara da obavlja poslove koje predviđaju Zakon i ovaj Statut ili drugih poslova koje mu povjere organi Udruženja, Upravni odbor može imenovati vršioca dužnosti Sekretara.

U slučaju privremene spriječenosti Sekretara da vodi zapisnik sa sjednica Upravnog odbora ili Skupštine, osoba koja predsjedava sjednicama, može predložiti drugog člana kao privremenog zapisničara, o čemu odluku donose navedeni organi natpolovičnom većinom.

Član 23.

Sekretar Udruženja u okviru svojih nadležnosti:

- pomaže predsjedniku i potpredsjedniku Udruženja u njihovom radu,
- obavlja administrativno-tehničke i finansijske poslove Udruženja,
- priprema materijale za sjednicu Skupštine,
- vodi zapisnike na sjednicama Upravnog odbora i Skupštine,
- vodi evidenciju članstva Udruženja,
- zajedno sa predsjednikom i potpredsjednikom Udruženja čuva pečate i vodi arhivu Udruženja,
- obavlja i druge poslove koje mu povjeri Skupština, Upravni odbor i Predsjednik Udruženja.

Poslovníkom o radu Upravnog odbora bliže će se urediti djelokrug rada Sekretara Udruženja..

Nadzorni odbor

Član 24.

Nadzorni odbor je organ kontrole rada i poslovanja Udruženja i njegovih organa.

Nadzorni odbor broji 3 (tri) člana, uključujući i predsjednika Nadzornog odbora.

Članovi Nadzornog odbora ne mogu istovremeno biti i članovi Upravnog odbora, niti mogu biti birani za predsjednika Skupštine.

Predsjednika i članove Nadzornog odbora bira Skupština na mandatni period od četiri godine sa mogućnošću ponovnog izbora.

Član 25.

Nadzorni odbor radi u sjednicama.

Sjednica Nadzornog odbora se održava po potrebi, a najmanje jedanput godišnje.

Nadzorni odbor donosi odluke većinom glasova.

Predsjednik Nadzornog odbora zakazuje sjednicu najkasnije 15 (petnaest) dana prije održavanja iste.

Predsjednik Nadzornog odbora je dužan proslijediti dnevni red zajedno sa pratećim materijalima u elektronskom obliku članovima Nadzornog odbora najmanje sedam dana prije održavanja sjednice.

Nadzorni odbor može zatražiti sazivanje sjednica Upravnog odbora i Skupštine ako utvrdi nepravilnosti u finansijskom ili drugom poslovanju Udruženja, nemarnosti u izvršavanju poslova ili povrede Statuta i drugih opštih akata Udruženja.

Nadzorni odbor za svoj rad odgovara Skupštini Udruženja.

Svaki član Nadzornog odbora može zatražiti svoje razrješenje prije isteka mandata na koji je izabran, a dužan je obavljati svoje dužnosti do donošenja odluke o razrješenju.

Odluku o razrješenju iz prethodnog stava donosi Skupština.

Nadzorni odbor u cjelini može biti opozvan i prije isteka mandata na koji je biran ukoliko prekorači svoja ovlaštenja, ne ispunjava svoje obaveze ili krši odredbe ovog Statuta.

Opoziv Nadzornog odbora iz prethodnog stava može zatražiti Upravni odbor ili Skupština.

Odluku o opozivu donosi Skupština.

Član 26.

Nadzorni odbor u okviru svojih nadležnosti:

- nadzire primjenu Statuta i drugih opštih akata Udruženja,
- donosi Poslovnik o svom radu,
- nadzire materijalno-finansijsko poslovanje Udruženja,
- nadzire zakonitost rada Upravnog odbora,

- podnosi Skupštini izvještaj o svom radu, najmanje jednom godišnje, i
- podnosi Skupštini izvještaj o izvršenom nadzoru kada Skupština razmatra i usvaja Izvještaj o finansijskom poslovanju Udruženja, i
- obavlja i druge poslove u skladu sa Zakonom, ovim Statutom i drugim aktima Udruženja.

Poslovníkom o radu Nadzornog odbora bliže će se urediti pitanja od značaja za rad i odlučivanje Nadzornog odbora Udruženja.

VII – PREDSTAVLJANJE I ZASTUPANJE UDRUŽENJA

Predsjednik udruženja

Član 27.

Predsjednik i potpredsjednik Udruženja predstavljaju i zastupaju Udruženje, a bira ih Skupština na mandatni period od četiri godine, sa mogućnošću ponovnog izbora.

Predsjednik i potpredsjednik Udruženja za svoj rad odgovaraju Skupštini.

Predsjednik Udruženja je ujedno i predsjednik Upravnog odbora.

Potpredsjednik Udruženja je ujedno i potpredsjednik Upravnog odbora.

Predsjednik i potpredsjednik Udruženja ne mogu biti članovi Nadzornog odbora, niti birani za predsjednika Skupštine.

Ovlaštenja Predsjednika Udruženja u slučaju njegove odsutnosti, spriječenosti ili prijevremenog završetka mandata, prelaze na potpredsjednika Udruženja.

Predsjednik i potpredsjednik mogu biti opozvani i prije isteka vremena na koji su izabrani i to:

- na sopstveni zahtjev,
- ako ne obavljaju pravilno poslove predsjednika i potpredsjednika Udruženja,
- ako svojim radnjama nanose štetu i ruše ugled Udruženja i
- u drugim slučajevima predviđenim Zakonom, ovim Statutom i drugim aktima Udruženja.

Predsjednik i potpredsjednik Udruženja su obavezni da poslovanje Udruženja vode po mjerilima zakona, odredbama Statuta i odlukama Skupštine Udruženja.

Predsjednik Udruženja:

- predstavlja Udruženje u pravnom prometu prema trećim licima,
- provodi i odgovara za utvrđenu politiku Udruženja,
- podnosi pismene izvještaje o radu Udruženja,
- učestvuje u pripremi svih akata Udruženja,
- potpisuje opća akta Udruženja, i
- informiše javnost o aktivnostima Udruženja.

VIII – JAVNOST RADA UDRUŽENJA

Član 28.

Rad Udruženja je javan.

Javnost rada obezbjeđuje se:

- javnim održavanjem sjednica svih organa Udruženja,
- dostavljanjem izvještaja o radu, godišnjih finansijskih izvještaja, finansijskom planu i drugih dokumenata organa članovima Udruženja,
- obezbjeđivanjem prava članovima da po svim pitanjima javno iznose svoje mišljenje, kritiku i prijedloge za njihove rješavanje,
- redovnom saradnjom sa sredstvima javnog informiranja,
- kreiranjem i ažuriranjem web stranice Udruženja.

IX – FINANSIRANJE I IMOVINA UDRUŽENJA

Član 29.

Sredstva za finansiranje djelatnosti Udruženja obezbjeđuju se iz:

- članarina,
- dobrovoljnih priloga i poklona fizičkih i pravnih lica,
- donacijama, dotacijama i sponzorstvima,

- sredstvima ostvarena učešćem u projektima,
- sredstvima prikupljenim štampanjem udžbenika, priručnika, zbirkih zadataka, te drugih didaktičkih materijala,
- sredstvima prikupljenim organizacijom takmičenja, skupova, seminara, predavanja, škola i slično, i
- sredstvima prikupljenim iz drugih izvora u skladu sa zakonom.

Član 30.

Sredstva Udruženja mogu se koristiti samo za ostvarivanje ciljeva i zadataka Udruženja, a na osnovu programa rada Udruženja i utvrđenih finansijskih planova te pozitivnih zakonskih propisa.

Član 31.

Sopstvenim prihodom Udruženje samostalno raspolaže preko svog žiro računa na način utvrđen odlukama Upravnog odbora i u skladu sa Zakonom.

Član 32.

Udruženje ima otvoren transakcijski račun kod jedne od komercijalnih banaka.

Član 33.

Naloge za utrošak sredstava Udruženja potpisuje predsjednik Udruženja, odnosno potpredsjednik Udruženja u slučaju spriječenosti predsjednika Udruženja.

Član 34.

Udruženje može imati u vlasništvu nepokretnu i pokretnu imovinu.

Imovinom u vlasništvu Udruženja upravlja Upravni odbor.

Član 35.

Upravni odbor na kraju kalendarske godine donosi izvještaj o radu Udruženja i finansijski izvještaj i isti prezentira Skupštini na usvajanje.

Ukoliko se izvještaj iz stava 1 ovog člana ne usvoji na Skupštini, isti se vraća Upravnom odboru na doradu. Dorađeni izvještaj se daje na usvajanje na sljedećoj sjednici Skupštine.

X – SARADNJA SA DRUGIM UDRUŽENJIMA, OGRANIZACIJAMA I ORGANIMA

Član 36.

Udruženje, u ostvarivanju programskih ciljeva u skladu sa ovim Statutom, saraduje sa organizacijama koje imaju iste ili slične ciljeve, sa organima vlasti na svim nivoima, sa školama, pedagoško-prosvjetnim zavodima, univerzitetima, fakultetima, te naučnim i stručnim i privrednim subjektima.

Udruženje, u okviru svojih prava i dužnosti, saraduje i razvija odnose sa sličnim organizacijama u drugim državama u skladu sa Ustavom, zakonom i međunarodnim ugovorima.

XI - PRIPAJANJE, RAZDVAJANJE, I PRESTANAK RADA UDRUŽENJA

Član 37.

Udruženje se može pripojiti drugom udruženju sa istim ili sličnim programskim ciljevima. Uslovi pod kojima se Udruženje spaja sa drugim udruženjem određuje Skupština.

Udruženje se može razdvojiti na dva ili više udruženja. Uslovi pod kojima se Udruženje razdvaja na dva ili više udruženja određuje Skupština.

Član 38.

Odluku o pripajanju, razdvajanju ili prestanku rada Udruženja donosi Skupština Udruženja.

Za odluku iz stava 1 ovog člana potrebna je dvotrećinska većina prisutnih članova Udruženja.

XII – POSTUPAK ZA DONOŠENJE STATUTA, IZMJENA I DOPUNA STATUTA

Član 39.

Kada se utvrdi da postoje opravdani razlozi, može se podnijeti zahtjev za donošenje novog Statuta ili izmjene i dopune postojećeg Statuta.

Inicijativu za promjenu, dopunu ili izmjenu Statuta mogu podnijeti:

- članovi Udruženja,
- članovi Upravnog odbora,
- članovi Nadzornog odbora.

Inicijativa iz stava 1 ovog člana dostavlja se pismenim putem sekretaru Udruženja koji je dužan da inicijativu prosljedi predsjedniku Upravnog odbora radi razmatranja na

sljedećoj sjednici Upravnog odbora. Ukoliko Upravni odbor usvoji inicijativu, inicijativa se prosljeđuje predsjedniku Skupštine na razmatranje na sljedećoj Skupštini Udruženja.

Član 40.

Inicijative za donošenje novog Statuta, ili izmjenu i dopunu postojećeg Statuta se usvajaju dvotrećinskom većinom glasova prisustvni članova na sjednici Skupštine.

XIII – PRELAZNE I ZAVRŠNE ODREDBE

Član 41.

U slučaju prestanka rada Udruženja, imovina Udruženja se predaje organizaciji ili udruženju koje bude osnovana sa istim ili sličnim sadržajem uz saglasnost Skupštine Udruženja i pod uslovima koje odredi Skupština.

Ukoliko organizacija iz stava 1 ovog člana ne bude osnovana, način raspodjele imovine Udruženja odlučuje Skupština.

Član 42.

Tumačenje članova ovog Statuta daje Skupština Udruženja.

Član 43.

Udruženje nastavlja isti i sličan rad Udruženja građana „Društvo fizičara u Bosni i Hercegovini“ upisanog u registar udruženja građanja pri Ministarstvu pravde Federacije Bosne i Hercegovine u knjigu I pod rednim brojem 04-05-2-7246/00 i preuzima sva prava i obaveze svog prethodnika.

Član 44.

Ovaj Statut stupa na snagu danom donošenja, a primjenivat će se od dana upisa u registar kod nadležnog Ministarstva pravde Federacije Bosne i Hercegovine.

Član 45.

Stupanjem na snagu ovog Statuta, naziv Udruženje građanja „Društvo fizičara u Bosni i Hercegovini“ mijenja se i glasi „Društvo fizičara u Federaciji Bosne i Hercegovine“.

Član 46.

Stupanjem na snagu ovog Statuta, Statut Udruženja građana „Društvo fizičara u Bosni i Hercegovini“ usvojenog na Skupštini 27. 11. 2000. godine prestaje da važi.

Član 47.

Stupanjem na snagu ovog Statuta, pečat Udruženja građana „Društvo fizičara u Bosni i Hercegovini“ prestaje da važi i zamjenjuje se pečatom Društva fizičara u Federaciji Bosne i Hercegovine.

U Sarajevu, 01. 04. 2017.

**Predsjednik Skupštine Društva fizičara u
Federaciji Bosne i Hercegovine**

Emir Ramić, prof. fizike